 *N. Cornapæus*  
*ex Herodot*  
*Lib III*



Early European Books, Copyright © 2009 ProQuest LLC.  
Images reproduced by courtesy of the Royal Library, Copenhagen.  
LN 934 4°








Early European Books, Copyright © 2009 ProQuest LLC.  
Images reproduced by courtesy of the Royal Library, Copenhagen.  
LN 934 4°





Early European Books, Copyright © 2009 ProQuest LLC.  
Images reproduced by courtesy of the Royal Library, Copenhagen.  
LN 934 4°



Early European Books, Copyright © 2009 ProQuest LLC.  
Images reproduced by courtesy of the Royal Library, Copenhagen.  
LN 934 4°




48, - 32.

LN. 934


M













DELIBERATIO  
SAPIENTISSIMA  
DE CONSTITVENDA OPTIMA

FORMA REIPVBLICAE, HABITA  
*post obitum Cambysis in Senatu  
principum Electorum  
regni Persici.*

*Ex tertio historiae Herodoteae libro  
Latinè conuersa.*

Interprete  
M. NICOLAO CORNAPAEO.



H A F N I Æ,  
*Imprimebat Laurentius Benedictus.*  
ANNO CLV LXXXII.



IN HENRICVM RANTZOVIVM  
EQVITEM HOLSATVM &c.

Epigramma ἑγκωμιασικόν.



*Vis non Alcidem nouit, quis nescit Achillem,  
Nomina non ulla non memoranda die?  
Et tamen hic medicam fecit feliciter artem,  
Sanus ut Amonia cuspide Mysus ait:  
Ille polum ceruice tulit, cum sidera fessus  
Amphitryoniadae ferre dedisset Atlas.  
Quid loquar amborum geminata laude celebrem,  
Illustri HENRICVM stemmate Rantzouium?  
Quem iuuat immenso spaciante viuere caelo,  
Et stellas oculis dinumerare suis.  
Quiq; Machaonia caput extulit inclytus arte,  
Naturæ scrutans omniparentis opes.  
Maeste noua virtute heros: sic additus astris  
Caelifer est, semper uiuit & Aecides.*

Gregorius Berfmanus professor  
Acad. Lips. publicus.





VL  
GENEROSO AC NO-  
BILI VIRO, EXCELLENTI VIR-  
TVTE, ERVDITIONE, SAPIENTIA, ET AV-  
toritate illustri, D. HENRICO RANTZOVIO Equiti  
Holsato, serenissimi regis Daniae &c. In ducatibus Holsatiae,  
Slesuici, Dithmarsiae praefecto atq; Consiliario, Domino  
in Bredenberg &c. Domino &  
Patrono suo honorando.

S. D.



Vantum momenti habeant sapienter scripta hi-  
storia, ad instruendam vitam humanam insigni-  
bus variorum consiliorum & euentum exem-  
plis: à multis, nobilissime D. HENRICE,  
cum priscis temporibus, tum nostro aeo, sapientissimis viris  
animaduersum est. Cum enim duae res sint, quae omnia  
hominum sanorum consilia actionesq; praecipue gubernent,  
doctrina videlicet, seu praecepta in philosophia & legibus ho-  
nestis proposita, & illustria omnium officiorum exempla: illa  
quidem ex philosophorum libris, haec verò ex diligenti histo-  
riarum lectione depromenda erunt. Ac conspectiora fere  
sunt exempla, in illustri posita monumento, & efficacius mo-  
uent animos rudiorum, quam nuda regenda vitae praecepta.  
Quare sapienter Diodorus Siculus Historiam benefactricem  
communis societatis hominum appellauit, cum sine historia-  
rum lumine, & temporum descriptione, omnes insignes im-  
periorum mutationes, omnes sapienter institutas deliberatio-  
nes, omnia praeciosa virtutum ac vitiorum exempla, & pacis  
atq; belli artes in tenebris iacere, & prorsus ignorari necessum  
foret. Idq; cum intelligerent viri sapientes & industrii,  
non illi modo, qui literarum studiis totos se tradidissent, sed re-  
ges etiam & principes fortunae dignitatisq; amplissimae: om-  
nibus

A 2



nibus seculis historiarum cognitionem plurimi fecere. Nam Philippum Palatinum principem sapientissimum tanto cognoscendarum historiarum studio flagrasse accepimus, ut Rodolphum Agricolam, excellenti ingenio ac eruditione virum, multa sibi & ex Græcis historijs vertere, & integram Monarchiarum seriem ex monumentis Ebraeis, Græcis & Latinis contexere voluerit: ut memoria complecti tempora mundi, & principum imperiorum sedes ac successiones velut in tabella depictas contemplari posset. Ac similia exempla multa recitari possent magnorum regum, principum & Monarcharum, qui & ipsi historias scripserunt, & historiarum peritos in summo semper honore habuerunt, eosque amplissimis muneribus & premijs affecerunt.

Certum est autem, post monumenta Prophetica, in quibus continua annorum series ab exordio mundi usque ad Persicam Monarchiam singulari DEI beneficio conservata extat, primum & precipuum historicum, qui diligenti lectione evolvendus sit, esse Herodotum Halicarnasenum, cui tantum tribuit vetustas, ut parentem historiae Græcæ appellauerit. Nam in eo ipso momento ferè, ubi finis est historiae Propheticae, suam exorditur, & usque ad decimum annum Xerxis & memorabile praelium ad Plateas, continua serie annorum 230, deducit. Ac multa interim optimo suavisimoque orationis genere narrat, quæ cum historijs Biblicis prorsus congruunt, easque multis in locis mirifice illustrant. Deinde abundat mirandis exemplis mutationum in imperijs & regnis principibus, in Aegypto, Medico, Persico, Lydio & Ionico, & multa recitat politica consilia & deliberationes gravissimas, quæ nervi sunt bonæ & felicitis gubernationis. Multa etiam exempla continet virtutum & viciorum insignia, ac simul scelerum penas narrat, ut lectorem de iudicio diuino commonefaciat, & ad studium virtutis exuscitet.

His



His igitur de causis frequens & assidua historiae Herodoteae lectio ab omnibus, qui in aliquo eruditorum numero censerī cupiunt, suscipienda est. Ac ut de me priuatim dicam, fateor equidem me immortales gratias debere C. L. V. D. Dauidi Chytrao praeceptori meo observando, quem cum ante annos sex in celeberrima Academia Rostochiensī audirem Chronicon Carionis Philippicum eruditissimè enarrantem, & simul Herodoti nomen creberrimis ijsq; valde honorificis sermonibus usurpantem: perfectum hac ratione fuit, ut mirifico quodam cognoscendae historiae Herodoteae desiderio accenderer, eamq; ex illo tempore (quantum quidem in hac ingenij imbecillitate, & per aliorum studiorum occupationes licuit) mediocri diligentia evoluerim, non tantum propter rerum cognitionem multiplicem, verum etiam propter Graeci sermonis nativam quandam elegantiam & facilitatem, cuius studio me aliquam aetatis partem impendisse non diffiteor.

Extant autem in historia Herodoti, inter alia multa illustria omnium humanorum officiorum exempla, duae sapientissimae gravissimaeq; deliberationes, diuersis temporibus in Senatu regni Persarum habita: in quarum una, sub lib. 7. pag. 244. Xerxe instituta, de bello Graeciae inferendo, in altera vero de forma gubernationis & optimo statu Reipub. sententiae conferuntur: utraq; sanè omnium eruditorum ac sapientum admiratione lectioneq; dignissima. Ut enim de posteriori tantum dicam hoc tempore: cum tres sint formae regiminum, aut enim penes unum summa imperij potestas est, aut penes optimates, aut penes populum: accuratissimè sanè in hisce tribus contrarijs orationibus singula examinantur, earumq; vitia & morbi, seu ut Aristoteles vocat παραβάσεις τῶν ὀρθῶν lib. 3. polit. πολυτεῶν velut in speculo conspicienda proponuntur. Nam cap. 4. Otanes, qui primus suam sententiam dicit, reprehensa tyrannide, δημοκρασίαν suadet: Megabyzus contra, exploso statu



populari, ἀριστοκρατίαν laudat: Darius verò μοναρχίαν Rei-  
publica utilissimam fore censet, cuius sententia ceteri quoque  
assentiuntur.

Cum itaque hac sapiens & gravis deliberatio omni-  
bus, qui magistratus gerunt, lectu utilissima atque incun-  
disima sit: offero eam tibi, nobilissime D. HENRICE,  
superioribus diebus latinitate à me donatam, paulò ut spero  
dilucidius καὶ παραφραστικώτερον, quàm habet vetus versio.  
Ac reuerenter & submisse oro, ut hoc quicquid est muneris  
(tenuissimum enim esse ipsemet agnosco, cum propter tem-  
poris angustiam, aliisque impedimenta plurima, alteram quæ  
in septimo extat deliberationem adiungere, uti volebam,  
non potuerim.) benigne suscipias, & voluntatem declarandi  
meam erga te observantiam boni consulas. Dabo enim ope-  
ram, conatus pios adiuuante domino, ut si hoc officium no-  
strum gratum tibi accidisse intellexero, maiora aliquando sub  
amplissimi nominis tui patrocínio appareant, & huius mu-  
nusculi tenuitatem apud æquos aestimatores recompensent.  
Bene & feliciter vale vir nobilissime. Perscript. Hafnia s.  
Calend. Maij Anno MD LXXXII.

Nicolaus Cornapæus.





4

# SAPIENTISSIMA DELIBE.

ratio de constituenda optima  
forma Reipub.

Ex tertio Herodoti libro  
Latinè conuersa.



Ostquam Cambyfes Cyri filius, secundus Persarum Monarcha, qui multa nefanda scelera in intimos consiliarios suos, in germanum fratrem Smerdin, in sororem, in sacerdotes ac Deos ipsos crudelissimè perpetravit, ex vulnere fortè à proprio gladio fœmori inflicto, cum ex Ægypto in Persiam reuersurus esset, supremum diem obisset: Magi, qui regiæ arcis custodiendæ causâ domi relictî erant, imperium Persiæ fraudulentis artibus ad se transferre conati sunt. Nam vnus illorum Smerdin Cambyfis fratrem, de cuius cæde nihil dum Persis constabat, sese mentiebatur, quòd non solum eodem nomine, sed etiam externis lineamentis oris ipsum proximè referret: & sub hac ementita persona menses iam septem imperium tenuerat. Sed fraude tandem per aliquot indicia detecta, (ipse enim, præterquam quòd arce nunquam egrederetur, nec procures regni in colloquium admitteret, etiam auribus carere deprehensus erat, & à Prexaspe Magum regnare, non Smerdin Cyri filium, publicè proclamatum fuerat.) conspirârunt in necem eius septem è primoribus Persarum, in libertatem vindicaturi regnum Persicum, videlicet Otanes, Aspathines, Gobryas, Intaphernes, Megabyzus, Hydarnes & Darius. Re itaq; sapienter deliberata, cum in arcem hi Septem viri peruenissent, & quidem in illud ipsum conclaue, in quo Magi morabantur, facto acerrimo conflictu, vtrumq; Magum interfecerunt, & mox reliquis Persis, ostentantes Magorum capita, rem omnem exposuere. Quibus adeo approbatum est hoc præclarum Septem virorum facinus, vt ipsi etiam

*Hæc sparsim narrantur libro tertio.*



etiam arreptis pugionibus, in obuios quosq; Magos impetum facientes, quotquot possent confoderent: & nisi nox superueniens illorum retardasset vehementiam, ne vnus quidem Magus superstes remansisset. Et hunc quidem diem Persæ præ cæteris omnibus solenniter colunt, & in eo ingens Festum, cui à cæde Magorum μαγοφονίασ nomen est, publicè celebrant: quo die nulli Magorum in publicum prodire fas est, sed domi se continent Magi, donec is transactus fuerit.

Elapsis autem diebus quinque, cum resedisset tumultus, in deliberationem illi Septem viri, qui Magos oppresserant, rem omnem vocauêre: ac dictæ sunt orationes, quæ etsi parum fidei apud nonnullos Græcos habeant, dictæ tamen fuerunt. Otanes quidem hortabatur, in medium vt Persis rerum summam deponerent, in hanc sententiam verba faciens.

*Vt in posterum tempus, vnus è nobis solus rerum potiatur, non videtur mihi consultum, quòd nec iucundum illud sit, neq; salutare. Vidistis enim ipsi, quò se extulerit immanis improbitas Cambysis, & Magi improbitatem experti estis. Ac quomodo quæso vel fieri possit, vt in Monarchia res benè sint compositæ, in qua quæcunq; collibitum sit, impunè licet agere? Quæ res virum etiam optimum, si hanc nactus sit dominandi potestatem, à consuetis animi sensibus dimouerit: siquidem bona quibus circumfluit, insolentem ipsum iniuriosumq; efficiunt, & inuidencia verò à prima iam origine homini innata est. His autem duobus si quis laboret vitijs, nihil ipsi ad omnem*



nem malitiam videtur deesse. Partim namq; ex insolentia, satur rerum omnium, multa improbe designat, partim ex inuidia: cum tamen virum principem, ut cui omnium bonorum copia suppetat, inuidiæ morbo laborare minimè oporteret. Verùm accidit plerumq; ut ille contrario modo se erga ciues suos gerat. Nam & optimis quibusq; inuidet, quamdiu superstites illi huius lucis vsura fruuntur, & delectatur pessimis. Calumnijs quinimò aures præbere patulas, res ipsi optima videtur. Et quod omnium est maximè inconcinnum, si mediocri eum obseruantia prosequaris, molestè fert, quòd non impensè colatur: sin impensè quis eum colat, itidem molestè fert, assentationis concepta suspicione. Ac ut illa tandem quæ grauissima sunt, dicendo exequar, leges & statuta à maioribus accepta mutat, mulieribus vim affert, quos ipsi collibuerit, indicta causa damnat. Cum autem multitudo dominatur, primum quidem nomen omnium pulcerrimum habet, videlicet iuris ex præscripto legum æquabilitatem: deinde verò nihil perpetrat eorum, quæ Monarcha. Nam & sortitò magistratus gerit, & rerum à se administratarum rationem reddit, & consultationes omnes in commune refert. Quamobrem ego hanc sententiam dico, repudiato vnius dominatu, multitudinem nos euecturos esse, in hac enim insunt vniuersa.

B

Et



Et hanc quidem sententiam Otanes in medium proponebat. Megabyzus autem, ut paucorum potestati summæ rerum permitteretur, hac oratione hortatus est.

*Quæ de abolenda tyrannide dixit Otanes, eadem & à me dicta sunt: quod autem multitudini iussit imperium deferre, in eo sanè ab optima sententia aberravit. Nihil enim inepta multitudine stolidius est, nihil insolentius. Et res verò minimè toleranda est, dum tyranni insolentiam fugimus, in effrenatæ plebis nos incursumus proteruiam. Ille enim si quid committat, intelligens hoc facit: sed plebi ne quidem ut intelligat, contingit. Quomodo enim intelligat, qui nec edoctus est, nec novit ullum honestum officium, ne domesticum quidem? quiq; sine ratione irruens, instar fluminis hyberni, statum Reipub. perturbat? Quare si qui malè consultum Persis cupiunt, illi popularem statum introducant: Nos autem collegium virorum optimatum deligemus, quibus imperium committamus, inter eos enim & ipsi locum habebimus. Consentaneum est autem, optimorum virorum optima existere consilia.*

Atq; hæc sententia à Megabyzo in medium est allata: post quem Darius tertiam proposuit, ad hunc modum.

*Mihi verò quæ Megabyzus dixit, quatenus ea statum popularem spectant, rectè ille quidem dixisse videtur: qua autem parte nos ad confirmandum dominatum paucorum hortatus est, non item. Si enim*  
*tres*



tres status nobis proponamus, eosq̃ optimos omnes  
 fingamus, nimirum & plebem optimam, & pauco-  
 rum imperium optimum, & dominationem vnius  
 optimam: affirmo tamen, hunc statum cæteris lon-  
 gissimè antecellere. Neq̃ enim vno viro, qui opti-  
 mus sit, quicquam videatur præstabilius: quando-  
 quidem ille, si hac mente præditus sit, sine vlla repre-  
 hensione multitudinem gubernare potest: & consul-  
 tationes ea ratione ad inimicos vel maximè reticere  
 ac celari queunt. In statu verò paucorum, cum multi  
 studeant optimè promereri de Repub. solent inde acer-  
 rima odia priuata inter eos cooriri. Cum enim qui-  
 libet illorum præcipuus esse, & in dicendis sententijs  
 palmam obtinere cupiat, ingentibus tandem odijs  
 in sese mutuò deflagrant: ex odijs autem seditiones  
 oriuntur, ex seditionibus cædes, à cædibus ad vnius  
 imperium deuenitur. Atq̃ ita etiam inde patet,  
 quanto hæc sit cæteris formis Rerumpub. præstan-  
 tior. Rursum cum plebs dominatur, fieri non  
 potest, quin malitia exoriat, quæ simul atq̃ in  
 Respub. peruasit, non quidem odia inter improbos  
 existunt, sed magnæ conspirationes. Qui enim exi-  
 tium Reipub. moluntur, occultè illud faciunt, idq̃  
 eousq̃, donec aliquis plebi præpositus, tales homines  
 comescat. Qui etiam hac de causa admirationem  
 apud plebem consequitur, eamq̃ consecutus iam tunc

B 2

Monar.



Monarcha uidetur esse, declarans hoc modo etiam ipse, Monarchiam optimum imperium esse. Atque ut vno uerbo comprehendam omnia, unde quaeso nobis & cuius beneficio libertas acquisita est? num à plebe, aut statu paucorum, an uerò ab illo qui solus rerum potiretur? Quamobrem sic sentio, cum per vnum virum in libertatem simus vindicati, nos talem gubernationis formam retenturos esse, non abolentes prae-rea leges patrias, quæ bonæ sunt. Id enim nullo modo consultum nobis fuerit.

Hæ igitur tres sententiæ propositæ fuerunt, quarum ultimæ reliqui quatuor è Septem viris assenserunt. Otanes autem, qui iuris æquabilitatem apud Persas studebat introducere, cum cæterorum calculis sua uicta esset sententia, hisce verbis, in medium procedens, eos allocutus est.

Quandoquidem apparet, Viri coniuratores, oportere vnum aliquem è nobis regem fieri, siue sortitò eum elegerimus, siue multitudini Persarum liberam electionem permiserimus, siue alia quacunque ratione: nolim equidem in certamen vobiscum descendere. Nam nec imperare volo, nec aliorum imperio subiacere, sed hac conditione de iure imperij cedo, quòd nolim à quouam ex vobis neque mihi, neque posteris meis in infinitum vsq; imperari.

Hæc cum dixisset Otanes, reliqui sex viri orationi eius acquieuere, ipse autem è medio surgens, in certamen cum illis de regio diademate non venit.

F I N I S.



tm  
ut  
obis  
ebe,  
rum  
num  
uber  
aete  
omo  
  
arum  
tanes  
ntro  
i, hif  
  
ores,  
fortis  
eram  
e. no  
Nam  
sed  
quo  
fina  
liqui  
o



